

Yahudáay Kágad

Yahudáay Kágad

© 2019 Wycliffe Bible Translators, Inc.

Gón Báibalay rajánk kanókén thimay komakká

[Creative Commons Attribution-NonCommercial-NoDerivatives 4.0 International License](#)

Yahudáay Kágad

1 ¹ Cha Ákubay brát, Issáay hezmatkár,^a Yahudáay némagá,
pa hamá gwánk jatagénán ke Petén Hodáyá dóst ant o pa Issá Masihaygi gón sharrén pahrézé
dárag butagant. ² Shomay sará rahmat, sohl o ásudagi o mehr gésh o géshter bát.

Drógén ostádáni ásar o ákebat

³ Oo dordánagán! Wáhgdár atán pa shomá hamá rakkagay bárawá benebisán ke sajjahén áiay sharikdár én. Bale zalurat diston ke gón é chizzáni nebisagá, shomay delá shawk pédá bekanán tán pa hamá báwará johd bekanét ke yak randé palgárttagénán^b dayag butag o tán abad gón máshomá góna bit. ⁴ Chiá ke lahtén anchén mardom chérokái shomay nyámá potertag ke wati béhodáiy sawabá cha pésará mayárig kanag butagant. Á Hodáay rahmatán tába dayant o pa wati bénangén kár o wáhagán kára bandant o may yak o yakdánagén Wájah o Hodáwand, Issá Masihá namannant.

⁵ Shomá é sajjahén chizzán sarpad butagét o zánét, bale lóthán shomará tahtál bedayán ke Hodáwandá yak baré wati kawm cha Mesrá rakként, bale á ke békawar atant randterá gár o bégwáhi kortant. ⁶ Áiá hamá préshtag ham tán dádrasiay mazanén róchá tahárókiá gón abadmánén zamzilán bastagant ke wati ehtiáray borz o bolandén kadresh nazánt o wati jágahesh yalah dát. ⁷ Hamé paymá, Sodum o Gomurah o kerr o gwaray shahráni mardom, ke hamáyáni dhawlá bénangiesh kort o nárahbandén wáhagáni padá kaptant, abadi ásá perrénag butant tán pa degarán dars o ebrat bebant.

⁸ Anchosh, gón é sajjahén sargwastáni zánagá, hamá mardom ke wati wábáni tahá zendag ant, wati jesm o jáná palit o gandaha kanant, ehtiárá namannant o ásmáni zórmandán sobakka kanant. ⁹ Tantaná mazanén préshtag Mikáilá, á wahdá ke Mussáay jónay bárawá gón Shaytáná yak o doi kort, é tahná joryat néstat ke Shaytáná sobakk o mayárig bekant. Tahná gwashti: “Hodáwand tará sezá bedayát.” ¹⁰ Bale é, hamá chizzáni sobakki o békormatiá kanant ke cha áyán heccha nazánant. É mardom násarpan o békobánén jánwaráni paymá, wati sareshtay^c randá kapant o é paymá gár o bégwáha bant.

¹¹ Bazhn o apsáz pa áyán! Chiá ke Káenay^d ráhá rawant o wati puttáni padá Balyámay gomráhiá kapant o Kórahay^e sarkashiá bérána bant. ¹² É mardom, shomay pormehrén báwarmandi diwánán pa shomá bannámi o pólengé bant, wahdé pa békawáhi gón shomá hórigá waráka warant. É hamá shopánk ant ke tahná wati jenday pazzór kanagay randá ant. Hamá békawréni jambar ant ke gwátesha bárt. Hamá dhokkáli^f drachk ant ke békawar o bérisszag ant o do bar mortagant. ¹³ É zeray hamá mastén chawl o mawj ant ke wati sharmnákén káráni kap o gajján dara réchant. Hamá gesar o sargardánén estár ant ke tahárterén taháróki áyáni abadi ásar o ákebat ent.

¹⁴ Hannuh ke Ádamay haptomi nasl o padréch at, esháni bárawá chosh péshgóia kant o gwashtit: “Hodáwand gón wati lakkáni lakkén palgárttagénána kayt, ¹⁵ tán sajjahénáni dadrasiá bekant o é békodáén nábáwarán pa áyáni sajjahén gandahkárián o pa hamá sajjahén sellén habarán ke é békawarén gonahkárán áiay helápá gwashtagant, mayárig bekant.” ¹⁶ É mardom, gellahgozár, irázger o wati badkári o sellén wáhagáni boddhetagén ant, pa wat pahra bandant o pa wati nap o puttán gón cháplusi o charpzobáni mardomán satá kanant.

Báwaray sará mohr óshtag

¹⁷ Ji, oo dordánagán! Shomá may Hodáwand Issá Masihay kásedáni péshgóíán wati yátá bedárét ¹⁸ ke shomará gwashtesh: “Goddhi zamánagá, anchén rishkand kanók wadia bant o káyant ke wati

^a1:1 Asligén Yunáni nebeshtánka gwashtit: “golám”.

^b1:3 “Palgárttagén” hamá mardom ant ke gón Issá Masihay hóná cha wati gonáhán shódag o pák kanag butag o é dhawlá pa Hodáyá dar chenag butagant.

^c1:10 Saresht, bezán báten, fetrat, jawhar.

^d1:11 Káen hamá Kábil ent ke wati bráti kosht.

^e1:11 Kórah Mussáay zamánagay mardomé at.

^f1:12 Asligén Yunáni nebeshtánka gwashtit: “érahti”.

béhodái o sell o badén wáhagáni randgir ant.”¹⁹ É, donyái mardom ant, cha Hodáay Ruhá zebahrg ant o jetái dawra dayant.

²⁰ Bale oo dordánagán! Shomá watá cha pák o béaybén báwar o imáná mohr o mohkam bekanét o gón Pákén Ruhay madatá dwá belóthét.²¹ Watá Hodáay mehráni sáhegá bedárét o may Hodáwandén Issá Masihay rahmatay entezár o wadará bebét ke shomará pa namiránén zendá sara kant.²² Gón á lahténá ke dodel ant mehrabán bebét,²³ lahténá cha ásá bekasshét o berakkénét o dega lahténá rahmat pésh bedárét bale gón tors o larz o cha áyáni jámagán naprat bekanét ke áyáni jesmá palit kortagant.

Satá o saná

²⁴ Hamáiá, ke shomará cha thagal warag o kapagá mohr dáshta kant o béayb o gón mazanén shádmánié shomará wati porshawkatén dargáhá bort o sar korta kant,²⁵ may yakk o yakdánagén Hodá o rakkénóká, cha may Hodáwand Issá Masihay wasilahá, cha azal, annun o tán abad shán o shawkat o wák o kodrat berasát! Anchosh bát, ámin!